

曾國偉會吏長與聖士提反堂 2

受訪者：曾國偉會吏長（下稱「曾」）

訪問者：黃慧賢（下稱「訪」）

訪問日期：2013年11月13日

曾：你問到個職工團契嘅合作，有咩深刻嘅印象。我醒起有人提過，就唔係咁近似，但係又好近似，佢話一個人可以有啲好好嘅朋友，但係唔能夠有啲好好嘅同工，呢個就係在你出嚟做嘢，你有一啲同事同工同一齊做嘢呢，你就真係好困難嘅。咁我就唔係咁認同喇，當然有一半就係，啲朋友好緊要…係咪？你點可以有朋友？你即係好功利…尤其是家吓…朋友好緊要。

訪：退休之後？

曾：你在職都係需要，不過你有時間，好嘅朋友，唔係需要成日見面嘅。好似頭先講嗰啲都係一年見一次，但係佢返嚟嘅時候之前，或者返到嚟一定俾個電話你，我哋緊要聚一聚。我有咩事幹畀個電話佢，佢可以一定幫助。我個妹妹係喺美國結婚嘅，呢幾十年前呢，我父母唔能夠過去，代我父母代表家長，拖我個妹妹出去。

訪：你個朋友啊？

曾：就係呢個朋友，所以朋友…唔需要咩？但係大家講句說話，你就知道你第二句說話講啲乜嘢，就好好朋友，好似喺人生裏面都有幾個好好朋友咁樣，唔需要多。但係我哋去到工作，我哋就需要好多，大家都要當係朋友咁樣。當然人係有選擇，但係同工嚟講呢，做嘢你有一個同工嚟到…同你合作呢…你好困難嘅。但係我就用一個好人性嘅組織嚟做一個團隊，而係我喺幾十年呢…無論我去到邊度，我同我啲同工個關係就係好好嘅，當佢係一個家人咁。唔係話咩功利咁樣去對待，而係…的確人係需要係咁樣…你如果唔係咁樣嘅時候，你諗下…你所做嘅嘢有彼此嘅幫助…你點做至得㗎？而且，做嘢要大家好樂意咁做先至有效果出嚟。

所以去到邊度，都覺得個同工係同你一齊學習、一齊成長咁樣。所以呢，我就覺得就好似一家人咁樣。喺教會嗰度呢，唔係好似出面嘅機構，你有咩資格我先請你，或者[要]揀到咁嘅。但教會呢，有人喺教會嚟到事奉呢，已經好開心㗎…。我嚟到嘅時候已經有現成嘅同工係度，不過唔多。我嚟到聖士提反堂，係一個探訪，負責會計。

訪：霍太，霍葉惠珍？

曾：探訪咁樣，有啲係幫手嘅，就叫行政啦、書信啦、三個。你要求乜嘢呀？如果講當日聖士提反堂有咁嘅經濟能力呢，你會覺得好奇怪嘅，但事實上係咁，而家經濟不景嘅就更加，好多教友都唔知道。因為聖士提反堂呢，一路嘅…起學校、起禮拜堂、小學、中學係貸款嘅，冇錢嘅。張榮岳牧師要起乜嘢，大家一個大聚餐，大家認捐幾多錢，但係冇錢。大家覺得需要為上帝工作，為教會嘅事務一齊同心。所以我去到嘅時候呢，仍然有教友係畀分期奉獻嘅，因為啲錢呢喺晒禮拜堂，喺啲學校、建堂，特別犀利，所以邊有錢啫？所以樣樣都要好慳。

但係對於聖工嘅發展方面呢，其實聖工唔係用好多錢，係需要人同心協力去傳福音。你肯願意，就得㗎喇咁樣，嗰度冇欠缺嘅。若果有人有需要錢，都有問題，好樂意捐嘅咁樣，但係你要請多個人嘅時候，筆錢就唔同喇。

訪：即係嗰陣時係辦咗幾間學校啦，就做晒建堂嘅功夫啦，係唔係代表財政係好豐裕嘅？

曾：唔代表。

訪：甚至嗰陣時有好多牽涉，睇返嗰陣時爭取學校中學要變成資助學校嘅時候，或者變成資助學位嘅時候，其實要有一啲維修，或者要搞一啲改善工程。咁其實教會都係一大筆錢一大筆錢咁樣去攤出嚟嘅。咁喺呢一個咁樣嘅過程呢，其實代表教會係一個好寬裕嘅狀態？

曾：係呀，個費用幾大㗎，你維修啲冷氣。… 你唔需要擔心，你只要計劃好呢，就得㗎喇…。喺你嘅事奉裏面，應慳就慳，應用就用。喺我嘅任內，從來未試過出去出面嘅酒家，開咩慶祝會，堂慶都未試過。我覺得每一次呢，有啲咩就喺副堂慶祝，到會啦。後來就自己整啊，有個樂趣，即席煮嘢食咁樣，好開心㗎。因為好多時唔使俾錢添，係你自己煮，慳嘅…又好食、又開心、又健康，教友自由參加。

歡送我嘅時候呢，我都係主張自己[煮]嘅，我走嘅時候’03年咁嘛，既然我哋有西南區嘅聯合…聖路加[堂]，聖提摩太堂，啱啱幾個牧師都有調動啊。我哋就喺聖士提反堂，嚟做一齊歡迎歡送…幾開心…又唔使畀錢…係咪？用嘅錢好少，即係你運用嘅時候呢…有人肯參與事奉，即刻煮餐就喺副堂嗰度。呢個係一個好家庭式，好似好家人咁樣，佢哋參加都唔使畀錢，大家一齊快樂。所以喺我咁多年，我未試過出去，而家喺西環呢，第日或者會有啲大酒家喺度，有咩大酒家，又唔順路，要走出去呢就有咗嗰種興趣趣味。一方面嗰種意義，嗰種家人式嘅聚會，慳錢…唔使用錢…今日就唔同喇。咁我哋盡量要節儉，但係喺聖工嘅發展應用就用。

頭先講開我哋嗰個同工，我哋同工呢…好重視，…外面嘅機構點請，就算我哋…頭先你講話霍太咁樣…佢喺度咁，當然你唔能夠同出面比，如果佢有啲咩唔識咪教導囉，牧師有責任教導㗎嘛。咁樣，再唔乜嘢…出去學習進修，教會畀錢。所以聖士提反堂呢，好早就使用電腦，當時一有電腦嗰時，輪住出去學電腦，所以好早就有電腦，我有佢哋咁熟，但同工佢哋做呀嘛，所以就會識電腦，即刻使用，呢個咪出去學習囉。有啲乜嘢…就算讀神學訓練，接觸教友都係好事，乜嘢都可以學，你唔使好似外面請啲現有好高資歷嗰啲，教會唔需要咁樣，當然有咁就當然好，感恩，但係教會就應就住自己嘅情況同環境，喺我幾十年我從來未辭過一個人。

訪：但係個個人都好似慢慢咁樣培訓，慢慢咁樣去鼓勵令到佢哋喺不同方面…？

曾：當然啦，我哋呀…唔係請好多人…喺我嘅任內我唔係請好多人，我希望教友參與事奉。譬如收奉獻嘅，全部牧區議員做，你幾多個職員都唔會做得咁快，佢哋收錢計數專業嗰啲，撼撼聲做晒好清楚，唔會…幹事做交收點數咁樣都OK，呢個係最好嘅。

但係，唔係間間禮拜堂可以接受，點解呀？「我趕住去飲茶食飯…」，佢認識到嘅時候呢，做好…佢先覺得呢個係責任。聖士提反堂都有輪住牧區議員[做]，有啲係活動，有啲係做晒，有啲排隊…如果等得耐嘅時候佢會走，走咗之後就有嚟喇，佢要交奉獻，「整完我約咗人啊，唔收啦…第日啦…」第日就唔見咗人或者唔記得咗，呢個係一個大家彼此諒解關懷，扶持幫助，呢個係一個好需要嘅。

訪：我想問吓你任內，或者唔淨係聖士提反堂[嘅]問題，而係嗰陣時嘅其他聖公會都係，比較少啲請女傳道嚟呵，即係你嗰陣時都係好少啊？

曾：我哋有探訪…另一樣講呢就係我哋嘅同工呢，同埋幹事呢，對教會嗰個投入好大，同埋好愛教會。

訪：都有個傳統，起碼聖士提反堂有個傳統就係自己請返自己教友。

曾：咁又唔係咁嘅原因，因為喺我任內我請得唔係多人，但係呢佢哋都係好愛教會，呢啲就唔使錄嘅，我哋嘅同工招練俊牧師，好愛教會，佢自己好慳儉，但係對幫助人好寬容，供啲青年去外國讀書，佢唔理係聖士提反堂有啲青年部嘅教友，總言之佢覺得需要，佢自己的士都唔坐。

訪：但係其實呢，佢係咪叫做耐啲嘅聖士提反堂，即係少啲好似你哋其他聖公會嘅牧師咁樣，調得幾密嚟㗎，尤其是嗰啲在學？

曾：佢…係咁樣嘅…佢係屬於當日義務助理，佢本來呢係聖保羅書院小學嘅校長嚟嘅，早期好似叫主任，後來叫校長咁。佢好似未到退休年齡就差派咗去聖基道兒童院做院長，之後佢又嚟聖士提反堂做義務牧師嘅。佢個人就好忠心…嘅對教會，佢對人又好…[對]大家都好，對自己又慳儉到不得了。佢有兩間屋，就一間呢就係自己住，一間就收租，佢返天父處呢就俾教會。所以教會呢…聖士提反堂呢…有一間係佢嘅，佢仲將佢所有股票奉獻俾晒教會。一個咁對教會咁深，對物質一啲都唔乜嘢嘅…「上帝俾我嘅」…但係我想講出嚟就係佢對教會嗰種…

訪：所以佢同聖士提反堂嘅淵源都係幾耐㗎咁樣。

曾：耐呢…又唔可以話好耐，佢退休之後。因為佢係聖保羅書院小學就係隔離咗嘛，所以個關係呢…

訪：因為嗰陣時按立佢呢…我睇返呢…佢應該係由牧區議員…即係席理會…就係提名佢囉。即係其實我哋有一堆提名嘅名單，提名邊個去按立成為牧師，咁係得到牧區議員提名，我check過…不過要整理，所以我就話佢同聖士提反堂關係密切。

曾：但係呢…佢要感受到聖士提反堂對佢嘅關係，佢可以奉獻俾其他地方㗎…因為人與人嘅關係，咁我哋呢就有幾位同工係啲教友，資深嘅教友，就同佢成立一個會，就係照顧佢。因為人總會有啲衰老嘅時候，要照顧佢嘅生活起居，睇醫生，佢屋企裝修呀，一切繁瑣事務都【要】我哋照顧，仲有佢個招師母…要照顧佢…「我哋返天父度，要照顧埋佢，招師母返天父度嘅時候呢，我間屋就俾禮拜堂啦」咁樣。

訪：係話嗰個team係啲聖士提反堂定係啲其他地方㗎？

曾：主要係聖士提反堂，亦有一位…其實有兩位…即係好靠佢，好重要嘅人物咁樣，佢哋都好樂意去幫助一個咁忠心事奉教會嘅人。因為到嗰時候都真係唔知點樣，因為呢啲人好容易俾人乘機入嚟，即係我哋都睇到，攞晒你啲財產咁樣。佢都感受到，但係呢樣嘢呢，當時唔能夠交俾教會，因為交俾教會，咁教會啲人點樣出嚟啫？呢個係由佢自己選嘅…呢幾個人去幫佢手，呢幾個人又樂意幫佢一個長者。到呢件事最後啦，就將佢交俾教會…呢啲股票呢啲樓宇…交俾教會，咁教會就有啲麻煩事咁嘛。

另一位就係嗰個探訪，姓何叫何姑娘，佢又好愛佢個細妹，但係佢細妹就唔能夠處理自己嘅事務，佢覺得想食雞髀可以攞個金去換個雞髀，所以佢係需要我哋一班姊妹…佢地照顧佢，因為佢乜都唔曉得處理，就係當佢返天父度嘅時候，嗰間屋就俾教會。咁呢啲都係同工對教會…感受到…即係弟兄姊妹對佢哋嘅愛…所以有兩個單位都係同工奉獻俾教會嘅，係好有意思嘅。呢啲…咁樣…即係可以感受到呢個關係，好似家人咁樣。

訪：即係【如果】啲同工認為呢度只係一個返工嘅地方，同佢哋冇關係，就唔會將一啲佢哋認為最關心嘅嘢，即係身後事…可大可小㗎嘛…都係牽涉一啲人嘅關係…。頭先講到招太又好…何姑娘個妹都好，咁其實都係好關心佢哋嘅家人，都想教會有一個照顧。

曾：呢啲就要幫手呢啲事嘅資深嘅姊妹，都係要做好多關心嘅工作，佢起居飲食點呀…呢啲做埋啲安排呀…咁樣，佢哋自己唔知點樣處理㗎嘛。所以呢件事之後…然後先至交俾教會囉，咁樣教會就可以清清楚楚接收，唔會拖泥帶水。

訪：所以呢一啲咁樣嘅關顧，其實我都問過，而家唔做㗎？以前個年代先至會做呢啲嘢㗎？定係以前嘅年代做呢，都係教會還教會做，弟兄姊妹…一啲好資深嘅，都唔係係一個教會嘅層面做，係咪咁樣呀？

曾：因為由教會做呢，佢又好難同教會講嘅…呢啲嘢。教會好多時候民主自由選一啲人出嚟，話要做呢啲嘢，我唔知要點樣做㗎㗎。所以一定要…即係個人願意咁樣做，有關心你嘅弟兄姊妹，【好似】你家中嘅一份子咁樣，咁樣嘅愛心先至可以做得得到。咁所以呢…一啲事呢，係教會好難，有咁嘅紀錄，教會嘅紀錄就係有人送咗一個單位俾教會。點樣做，呢啲經歷寫唔到出嚟㗎，講就可以講一啲，但係唔係容易做嘅咁。所以我就嗰個大家同工呢，真係要好似家庭一樣。因為你話逐個講呢…就好難講嘅，而且會影響到…「會吏長點解你對呢個特別好，嗰個好難做㗎㗎」…但係我可以講嘅就係呢，過去嘅…大家都公認嘅，就係有個炳倫叔…好似姓黃嘅，佢哋教會嗰個忠心事奉，好恭敬嘅，佢專負責崇拜嗰個聖餐餐桌嘅佈置，禮拜堂嘅佈置呀咁樣。佢著起件藍色嘅袍呀咁樣。星期日呢佢負責嘅，點樣清潔啲聖餐用具呀，佢一個人喺度嘅時候呢，佢一樣恭恭敬敬咁嚟做嘅。聖公會有聖公會嘅禮儀㗎嘛，佢一早整好晒呢啲嘢。另一位呢…

訪：想問下佢件袍呢，係咪聖士提反堂俾錢，叫佢俾錢幫佢做件衫，買件衫咁樣做㗎？

曾：我就唔知喇…呢啲，因為我嚟到嘅時候呢，我係見到佢著起件藍色嘅袍嘅，嚟到每一次都係好恭敬，聖餐前嘅準備，聖餐後嘅處理咁樣。

訪：即係好莊嚴。

曾：係呀好莊重，點樣清潔有晒程序，唔係好似現在咁好似洗碗咁。

訪：即係唔係工友咁俾咁多人工我，佢亦都唔係啲啲階層，因為我聽另一個版本佢係負責看門㗎嘛，咁佢唔係啲啲我哋話好高學識嘅人呀，但係佢去到呢個環境佢點樣專心？

曾：咁當然佢唔係淨係處理呢啲嘢嘅，你話看門都唔出奇。另一個就陳林，我同佢相處最耐，我嚟到就佢已經喺度，到我離開嘅時候佢都仲喺度幫手㗎，未退休㗎但係好老喇咁樣。每一晚佢都巡視過禮拜堂學校兼門窗，特別係打風嘅時候佢搜查得更加清楚，打爛一個窗要搭棚嚟到安裝㗎咁樣。佢依時依候就巡晒，有人留返喺個校園裏面呀，呢個禮拜堂嘅園地裏面呀咁樣，啲門有冇咁好呀，淨係呢樣你都要一段時間先巡好晒㗎嘛。有一次呢我哋懷疑有人走入嚟，我哋都有方面呢講，喺保安各方面都做得好好㗎喇，我哋嚟住景輝樓個邊呢，個度呢有鐵枝嘅，需唔需要做啲防範呢咁樣。有一次呢隔離裝修搭棚㗎，搭棚好容易走入嚟㗎，哇我哋打醒十二分精神，跟住聽到有兩三伙呢俾人爆竊，同我哋好近咋嘛。啲竹棚走到過嚟㗎嘛係咪，咁佢走過嚟呢，都有乜嘢好偷嘅，但係亦唔可以話，因為我哋有電腦有盛吓嘛，雖然難啲…但係當時呢，喺個度最容易，入咗去呢就搵錢搵盛㗎嘛，所以兩三伙呀咁樣，即刻加鐵枝…即係及時。所以唔可以話我哋有嘢發生呀，有嘢俾人偷呀，偷完個度可以嚟呢度㗎嘛，如果我哋有啲咩唔防範嘅話，一樣俾人偷。我哋星期日試過有人走入嚟想偷嘢，咁佢入咗嚟呢喺教員室，譬如喺正門入嚟去到教員室㗎，個個教員室由頭可以到尾㗎咁樣。佢入到嚟呢，我哋發現㗎，佢又知道我哋發現，所以我哋喺正門有人喺度睇住，喺後門樓梯又有人睇住，呢多又唔得，個個門口又有人，佢亦唔知道邊個門口先最㗎。其實啲門口好多，但係我哋正門知道，結果呢佢冇得走，佢坐喺度等差人嚟到，因為我哋門口好多。

亦有呢…喺星期六，你叫工友好難知道邊個係教會嘅人，邊個係學生家長，邊個係呢度邊啲人。佢哋分唔到，尤其是星期六，哇，青年嘅活動好多㗎嘛，就有人咁樣入咗嚟教員室，嗰次真係偷完一次又一次，錢又好電腦又好，佢睇住入嚟修理呀或者點樣，教員啊咁樣，啲工友唔知㗎嘛。經過咁樣呢又要小心啦，加啲防範啦，小心呀，呢啲都係一個經驗，但係要及時截住以後再發生呢啲事。「林叔，可能有人入咗嚟㗎」，咁當時呢住喺我隔離呢，就係徐主教，[當時]佢係英國返嚟嘅徐牧師。話有人走咗入嚟㗎，你又擺支棍，我就擺掃把柄同阿林叔一路巡，巡完禮拜堂巡學校，嗰啲有可能開到門嘅，開唔到門嘅，你冇人嚟佢可以慢慢搞㗎嘛。巡過之後冇，呢個都係我哋有需要嘅時候大家要合作。所以我同林叔嘅接觸最多，有乜嘢就通消息。係我同佢住喺度咋嘛，當然仲有個助理，如果佢喺度嘅話咁樣樣，所以呢啲我哋就真係好似個家。

訪：所以你哋兩個就要幫手做晒保安。

曾：係啊，因為成間禮拜堂同學校，你個時就變咗看堂呀嘛，睇個情況我哋每個星期三呢，我哋就有一開始…即係工作之前…有個聚會，一個靈修聚會，一個分享，大家輪住嚟，嗰日負責講經文又好、分享你嘅經驗、聖經嘅話語，之後又就事工嘅分享，譬如嗰個星期有啲咩我哋係需要準備咁樣。我哋有咩困難呀、有咩需要大家一齊去做，我哋自己有咁嘅溝通，就好似開家庭聚會咁樣。

訪：係咪林叔啊，佢哋呢啲工友都會要參與？

曾：佢哋就唔可以，因為佢哋有個職責係度，佢哋就學校咁嘛，有學校嘅職責，就有辦法。但係我哋除咗呢個，呢個就係我哋喺教會嗰個範圍嗰度，嗰啲就係另外同佢哋有自己嘅溝通。

訪：其實都問吓，譬如啊陳林或者阿滿姐、阿貞姐，點解可以喺聖士提反堂做咁耐㗎呢？

曾：貞姐，細細個喺度大。點解咁耐，你問佢好啦，即係等於我哋好需要佢，佢又覺得喺呢度好似一個家庭咁樣，即係而家有咩聚會呢，我哋請返佢返嚟嘅，即係特別年長啲。有生日會有咩、慶祝會都請佢哋返嚟，呢個好似成咗習慣，佢雖然離開咗，我又退休，佢又退咗休喇咁樣，我都有約佢哋去飲茶，即係問候吓近來嘅生活呀。佢離職嘅時候因為隻腳唔係好聽使，咁就有健康嘅狀況呀。家吓好啲喇，退咗休好啲啦，即係未退休就係辛苦啲㗎，你要負責啲啲嘢。其實佢又可以嘅，佢丈夫又好錫佢嘅咁樣。陳林又係，其實佢返天父度之前…一年定大半年，我同佢去探吓林嫂，就近佢附近同佢去飲茶。呢個所以好似好忙咁，我哋啲係除非冇時間，冇時間我哋就可以聚吓，又可以傾吓咁樣。我哋大家【係】老人家，咁就呢啲都係當日好似家人咁樣，但係離開咗你就冇咗呢個咁樣相聚嘅機會，你會搵返呢啲機會嚟到見吓面。我感覺就係呢個係家人咁，你又唔能夠話家吓咁樣係咩，就算子女都唔能夠成日同你一齊聚，你要特意約先至可以，佢有佢節目，佢話佢【有】朋友，佢家吓通常嘅工作都好忙，要預約嘅，所以約到見面係好開心嘅事。

訪：我會覺得其實你講個個，牧師你都好平易近人啦，唔介意同一啲普通工友都可以做朋友。但佢哋又好難得㗎，可以約到你哋去飲茶。

曾：我就完全冇咁嘅，將人哋去咁樣分…所以喺我幾十年嘅事奉裏面呢，喺我個你所講嘅工作團隊入面，我就係個個家人，亦即係關係咁樣，佢做唔到嘅，我哋幫佢，佢唔曉嘅，我哋教佢，佢自己有接納啦。有一個學習，當然【如果】佢成日都本坭嘅，就好難呀，但係喺呢個家庭裏面，我哋對於啲朋友需要，我哋關心，佢唔肯接受咁冇得講。耶穌十二個門徒都有一個係…即係…但係你盡咗你嘅責任，你嘅態度係家人。所以我一路幾十年冇辭過一個人，只係有做得好啲有咁好咁樣，但係作為彼此嘅能力係有不同㗎嘛，你唔能夠迫一個佢有啲個能力嘅，你迫佢咁做，除非你想佢辭職，呢個就係咁樣。

訪：即係呢個…會唔會就係…你係呢個管理人…或者係做領導…喺聖士提反堂領導嘅角色嘅時候，你會重視嘅部分？

曾：其實我唔係單係聖士提反堂，我喺其他地方，無論係學校，對其他同工。因為我做港澳教區嘅時候呢，個教區嘅會吏長係會睇晒禮拜堂，禮拜堂有咩需要嘅時候呢、有租屋、有啲咩都去關注，個度有啲咩困難問題你又要去關注咁樣。有咩拗撬、交接禮、一個牧師去一間新堂個個、我都可以做一個見證人…我就咁樣。但係唔係人人接受，一啲唔想你知咁多嘢。我就對主教…原則上每間禮拜堂嘅主任牧師，我係代表主教嚟管理間禮拜堂。所以我也嘢嘢呢，當然好鎖碎啲係你範圍應該做嘅，你唔好…所有重要問題都要話俾主教聽，唔好突然間…乜發生啲咁嘅事，我都唔知，我要講俾主教聽。有啲話我使乜講俾主教聽，我搞返掂佢咪得囉，尤其是財政上嘅問題、人事上嘅問題…呀…你唔好爆咗出嚟你先至[講]，主教問你咁嘛…咁樣。所以做事要清清楚楚，你對教會你係要…即係你唔係嚟打工，你係嚟事奉…希望咁樣…你要好清楚，你又要好關心。

我雖然係會吏長，但係我從唔覺得我係行使我會吏長嘅咩權責：「你要聽我話」。如果佢唔鍾意嘅話呢，我感受到嘅，大家做嘢，去起禮拜堂去發展聖工。你唔喜歡嘅，你可以退咗出去。因為某方面嚟講呢…我可以話…主教都有叫我咁做，我就…甚至乎俾我會吏長呢個職位，我曾經同主教講：「喺澳門，你需唔需要俾呢個名我？」我都夠老喇喇，我資深喇喇，大家都相信，咁使乜掛呢個名上去啫？而且我咁耐我都係我同同工嘅關係，係一齊發展，起聖提摩太堂有咩特別事工又好，我都係我同佢一齊做。我就唔會話：「你做呀！」我唔使，「你做好你報告俾我聽」，我從唔會做呢啲嘢，係大家一齊做。

…譬如起禮拜堂啦，聖提摩太堂，我哋請咗個則師去起嘅時候，呢個一人則師嚟嘅，係好平嘅，我哋都唔知道咁平嘅，我哋起個禮拜堂，唔係起，喺裝修啫，300萬港紙，咁你300萬你則師收幾多費用啫？10%？佢乜嘢都係佢做，佢以為慳錢。咁起完個地基之後，個loading呀盛…之後，佢同我講：「牧師我唔能夠繼續做啦，如果我做呢，我養唔到我老婆。」我哋再搵，搵唔到。仲有一樣呢，我哋喺聖誕節還是復活節開工，但係你係一個假期做唔成㗎嘛，要分開兩段時候，呢個又係有人肯接呢啲工作，你要分開兩批工人做嘢。因為學校呢好嚴㗎，你唔能夠喺我學校上課嘅時候做，[但]呢件事又可以㗎，個個幫我哋起嘅又可以㗎。咁所以某方面嚟講呢，有機會去聖提摩太堂，個到係一個停車場嚟嘅，好矮嘅一個ceiling但係呢入到去好通透嘅，呢個都係弟

兄姊妹，當時聖保羅堂呀、[聖]路加堂呀、聖馬太堂呀、聖士提反堂呀一齊起嘅。我覺得都幾滿意，因為咁矮嘅ceiling睇落去好通透，佢聖壇呢旁邊係用玻璃，玻璃有通花嘅好通透，你喺裏面呢睇到出面，出面呢睇到裏面，設計係整個設計，因為個則師要點樣樣，幫我裝修嘅時候整嘅，係我哋自己一齊去到諗嘅。所以好親切嘅，嗰啲階磚係我哋自己走去買嘅，咁所以我哋買呢，就要買啲又平又靚又襟用。所以今時今日呢，仲話個地磚好骨子，教友又覺得好，我哋又有份參與呢個事奉。所以我係需要教友一齊事奉。喺個委員會有則師、有工程師、有會計師，好多人才，你俾佢有機會嚟到事奉係好開心嘅事。假期就走去做嘅，平日放工之後又走去做嘅，咁呢個係一個表達到呢個家，唔係就咁講話兄姊妹，我講到順晒，但係喺我哋嘅行動、行為裏邊都少少，你保護我、我保護你，都有嗰個親切感。咁你要係行動上去表達，我哋呢一個家。一講自然樂意去，假期願意去參與事奉…佢哋拎假期出嚟去參與，因為嗰時候要趕，要趁呢個時候學校唔可以喺假期做唔到，就有得做㗎啦。所以兩個假期，復活節同埋聖誕節起好，就有加到錢，就三百萬…

(訪問完)